

四庫全書薈要

• 乾隆御覽本

集部

東坡全集卷一百一十三

宋 蘇軾 撰

內制批荅七十六首

賜正議大夫同知樞密院事安燾乞外郡不許

批荅

元祐元年
十月八日

覽表具之卿以應務之才居本兵之地綏靜中外人無
間言何疑上章欲求去位未喻厥意聞之憮然夫榮親
莫大於功名養志不專於甘旨而況魏闕之下父母之

邦退食問安孰便於此勉循其舊以卒輔予

賜安燾乞外郡不允批荅

元祐元年十月八日

省表具之夫事親者不擇地而安之孝之至也而况艱難之際一日萬幾永淵之懼當務同濟卿練達兵要灼知邊情寄託之深義難引去亟求自便朕何賴焉

賜新除中大夫守尚書右丞劉摯辭恩命不許

斷來章批荅

元祐元年十一月

覽表具之道有行藏時有用捨歲不我與難以智求道

之將行豈容力避大言大利固當安而受之小行小廉非所望於卿者成命不再可無復辭

賜劉摯辭免恩命不允斷來章批荅

元祐元年十一月

省表具之政如農耕以既獲為能事言如藥石以愈疾為成功若耕不獲疾不愈朕何望焉所以用卿者非以富貴卿也勉卒成業何以辭為

賜太師文彥博乞致仕不許批荅

元祐二年三月二十九日

卿出入四世師表萬民無羨於功名而有厭於富貴其

所以忘身徇國捨逸就勞者豈有求而然哉凡以先帝之恩生民之故也卿之在朝如玉在山如珠在淵光景不陳而草木自遂去就之際損益非輕昔西伯善養老而太公自至魯穆公無人子思之側而長者去之卿自為謀則善矣獨不為朝廷惜乎藥餌有間時遊廟堂家居之樂何以異此

賜太師文彥博乞致仕不允批荅

元祐二年三月二十六日

朕脩身以承六聖虛已以聽四輔而法度未定陰陽未

和民未樂生吏未稱職中夜以思方食而歎雖不敢以
事諉元老實望其以身率百官卿猶未即於安孰敢不
盡其力此聖母冲人之本意而天下有識之所望也昔
唐太宗以干戈之事尚能起李靖於既老而穆宗文宗
以燕安之際不能用裴度於未病治亂之效於斯可見
朕意如此卿其少安

賜宰相呂公著乞退不許批荅

元祐二年三月二十九日

卿才全而德備積厚而施博明亮篤誠坐屈群策既以

天下公議而用於此矣豈以卿之私意而聽其去哉水旱之災不德所召卿當助我求所以消復之道不當求去我也詩不云乎大夫君子昭假無羸大命近止無棄爾成勉思厥職以荅民望

賜宰相呂公著乞退不允批荅

元祐二年三月二十九日

用賢之功必要之久遠日計不足歲計有餘朕之用卿期於百姓之既富卿之自信亦豈一日而成功常暘之災天以警朕夙夜祇懼與卿同之朕若歸過於股肱何

以荅天戒卿若釋政而安逸何以塞民言各思其憂少
安厥位

賜尚書左丞李清臣乞退不允批荅

元祐二年四月十八

日

卿以方聞之舉擢自厚陵禁林之選用於神考逮受顧
命弼予冲人義既同於戚休身豈輕於出處遽欲引去
聞之惻然姑安厥常以助予治

賜尚書左丞李清臣乞退不許批荅

元祐二年四月十八

日

祥除之初念我聖祖所與共政不忘舊人而卿博學多聞通練古今小心畏慎不見過失力求引去為之惘然勉留輔予益祇厥服

賜文武百寮文彥博以下上第一表請皇帝御

正殿復常膳不允批荅

元祐二年四月二十二日

朕即位二年水旱繼作致災之故實惟冲人既延及於無辜復貽憂於文母是以坐不安席食不甘味實欲深

念厥咎豈徒見之空言而雨不崇朝農猶告病欲徇來
請惕然未寧其一乃心勉正厥事毋重朕之不德以答
天之深戒

賜文武百寮文彥博已下上第一表請太皇太

后復常膳不許批荅

元祐二年四月二十二日

旱暵之罰自冬及夏天之降災如此其久則夫致災之
道豈一日而然哉雖力行罪已之文尚恐非應天之實
而卿等以膚寸之澤遽欲即安覽之惕然未敢自赦其

交修不逮務盡厥誠期茲歲於有秋雖復常其未晚

賜文武百寮文彥博已下上第五表請皇帝御

正殿復常膳允批荅

元祐二年五月二十九日

朕以寡昧膺受多福常欲損上益下畏天之威矧茲旱
灾咎在不德而卿等以雨澤既至封章屢上勉從其意
甚媿于中夫天之有風雨雷霆猶朕之有號令賞罰朕
不脩明其事何以責應于天永思其終無忘納誨

賜文武百寮文彥博已下上第五表請太皇太

后復常膳許批荅

元祐二年五月二十九日

德積無素民罹其災精誠莫通禱不時應雖蒙膏澤之報僅救焦枯之餘勉徇來章猶虞後患其謹視盜賊勲卹流亡益務交脩以裨不逮

賜文武百寮太師文彥博已下上第一表請舉

樂不許批荅

元祐二年六月一日

先王之禮樂因情而立文君子之哀樂自中而形外夫有莫大之戚則有無窮之悲先皇帝天覆四方子養萬

物至今窮髮之表尚餘流涕之民而況宮庭之間母子之愛粗畢三年之制遂講八音之和所未忍聞非不欲作卿等謹於率禮篤於愛君徒欲亟舉舊章顧未深明吾意三復太息難於黽從

賜文武百寮太師文彥博已下上第一表請舉

樂不允批荅

元祐二年六月一日

禮之至者無文哀之深者無節故禫而不樂古人非以求名琴不成聲君子以為知禮朕以宗廟之重勉蹈先

帝之餘履其位惕然而自驚用其物潛焉而出涕未報
昊天罔極之德常懷終身不忘之憂欲從衆言亟舉備
樂而金石絲竹乃悽耳之聲干戚羽旄皆泣目之具哀
既未泯樂何從生再閱來章徒增感慕

賜文武百寮太師文彥博已下上第二表請舉

樂不許批荅

元祐二年
六月四日

過密之制雖盡於三年追懷之私豈論於歲月金石在
御惻然未寧吾不以一身之憂廢天下之樂今施之郊

廟用之軍旅州閭之會絃歌相聞獨盡餘哀止於中禁
以為於義未害是故行之不疑

賜文武百寮太師文彥博已下上第二表請舉

樂不允批荅

元祐二年
六月四日

朕少遭閔凶僅畢祥禪雖俛就企及非以過制為賢而
創巨痛深不能以禮自克觀過其黨聖人許之禮曰喪
三年以為極亡則弗之忘矣誠重違國老之忠告姑欲
盡人子之至情

賜太師文彥博等請太皇太后受冊第二表不

許批答

元祐二年
六月四日

吾聞聖人以天下為憂未聞以位號為樂也損已裕物
畏天檢身此吾平日之本心非獨遇災而一發也孔子
曰以約失之者鮮矣卿等以是輔我顧不美哉

賜文武百寮太師文彥博已下上第四表請舉

樂不許批答

元祐二年
六月九日

吾之本性以清淨寂寞為樂雖在平日無游觀聲伎之

念矧艱難之後哀疚之餘中夜以興方食而歎將不堪其憂者豈有意於樂哉雖欲勉從未能自克忠告屢却愧歎兼深

賜文武百寮太師文彥博已下上第四表請舉

樂不允批荅

元祐二年六月九日

鐘鼓以導和羽籥以飾喜譬之飲食之節適於口體之宜今衰麻之除莫敢逾制而琴瑟之御則有未安卿等忠誠確然開喻至矣惟反求諸心而弗得故欲行其言而未能推之人情當識朕意

賜太師文彥博等上第三表請太皇太后受冊

許批荅

元祐二年
六月九日

吾上順帝則下酌民言處以無心期於寡過卿等以為
協氣既應羣謀僉同若固違典禮之常恐莫慰天人之
望遇災而懼昔者非以為謙聞義則遷吾亦豈敢自必
勉從故事以副嘉言

賜新除中大夫守尚書右丞王存辭免恩命不

允斷來章批荅

元祐二年六
月十二日

士有品目定于僉言器之廟堂蔽自朕志豈有僉言既
穆朕志不移而用過謙之詞反已成之命亟服乃事宜
無復云

賜新除中大夫守尚書右丞王存辭免恩命不

許斷來章批荅

元祐二年六月十二日

為國不患於無人有人而不用之為患事君非難於辭
寵居寵而無媿之為難吾之用卿計已審矣卿之自信
又何疑哉

賜新除知樞密院安燾辭免恩命不許斷來章

批荅

元祐二年六月二十四日

覽表具之論材考德聖人所以公天下難進易退君子所以善一身權之以義孰為輕重訓兵論將威懷戎狄卿以是事上豈不賢於逡巡退避也哉

賜新除知樞密院安燾辭免恩命不允斷來章

批荅

元祐二年六月二十四日

覽表具之德稱其服臣主俱榮食浮於人上下交病朕

之為天下慮甚於卿之自為謀也思而後行有出無反
成命不再卿毋復辭

賜新除檢校太尉守司空依前開府儀同三司

致仕韓絳辭免恩命不允批荅

元祐二年
七月七日

國家尊異耆老砥礪廉隅凡致為臣必厚其禮而況卿
出入四世師表萬民身任安危位兼將相永惟三宗眷
遇之重宜極一品褒崇之榮成命既孚僉言惟允宜從
中外之望罔徇謙冲之私

賜韓絳辭免恩命不允批荅

元祐二年七月七日

朕惟耆老成人雖或謝事耄期稱道終不忘君其在丘園豈殊廊廟嘉猷入告卿其不易此心大事就訪朕亦敢忘斯義命秩之數典冊之文不如此無以慰朕心而荅民望國有常典卿毋復辭

賜太師文彥博辭免不拜恩命許批荅

元祐二年八月

二十七日

卿義重股肱望隆堂陛陛廉遠則堂皇峻股肱逸而元

首安故出異恩特鑄苛禮而卿深執恭翼力守典刑確然自陳義不可奪勉從其意愧歎于中

賜太師文彥博辭免不拜恩命允批荅

元祐二年八月

二十七日

朕優禮師傅達德齒之尊以亟拜為可略古之道也卿謹嚴朝廷明君臣之分以不拜為未安禮之節也道並行而不悖義有重而難移勉循所陳不忘嘉歎

賜宰相呂公著乞罷相位不許斷來章批荅

元祐

二年八月
二十七日

孔子曰苟有用我者晷月而已可也三年有成夫以聖人猶待三年而後成功況其下者今卿助我為治自以為既成矣乎其未也譬如玉人雕琢玉中道而易之豈復成器哉

賜宰相呂公著乞罷相位不允斷來章批荅

元祐

二年八月
二十七日

古者君臣之間率常千載一遇今聖母在位正身虛已

仰成輔弼雖踈遠小臣猶欲畢命自效而卿乃以小疾
求去縱無意於功名獨不惜此時乎勉卒乃事使百姓
富足四夷乂安然後謝事歸老豈不臣主俱榮哉

賜宰相呂公著乞罷相位除一外任不許批荅

元祐二年八
月二十八日

夫以才御物才有盡而物無窮以道應物道無窮而物
有盡凡今之患所乏非才以卿篤於愛君必能建長久
之策澹然無我可以寄枉直之權二年于茲百度惟正

事既就緒民亦小康至於微疾之屢攻此亦高年之常理卿其良食自輔為國少安譬如止水之在槃豈復勞心於鑒物心且不勞而況於力乎

賜宰相呂公著乞罷相位除一外任不允批荅

元祐二年八月二十九日

朕以天下之大知為君之難有朽索馭六馬之憂有抱火措積薪之懼正賴多士協於一心朝夕以思彌縫其闕凡今中外執事膂力之畢陳視吾一二老臣進退以

為節卿若無事而引去人將相顧以自疑而况邊鄙未
寧兵民多故而予左右之老先自求於便安則夫疎遠
之臣何以責其盡瘁勉輔不逮期於有成

賜宰相呂公著辭免不拜恩命允批荅

元祐二
年九月

日一

卿執德惟一守禮不回不以坐論為安而以拜上為泰
使朕不盡養老之意而卿得畏威之道勉從其志嘉歎
不忘

賜宰相呂公著辭免不拜恩命許批荅

元祐二年九月

一
日

君之視臣譬之手足方責其大不强所難而卿深執謙恭力求避免深惟孔子事君盡禮之義曲從其請以儆惰媮

賜太師文彥博上第一表乞致仕不允批荅

元祐

二年九月八日

省表具之卿之求去蓋數矣言不為不切而朕終莫之

從朕之留卿亦至矣禮不為不盡而卿終莫之亮君臣之際情不相喻朕甚疑之夫樂丘園而厭軒冕亦古人之一節而非聖賢之高致尊者老以重朝廷蓋天下之大計而非沖人之私欲與其使朕屈公議以從卿曷若卿少貶其私意以徇天下乎

賜太師文彥博上第一表乞致仕不許批荅

元祐

二年九月八日

覽表具之卿之所以欲去者二疲於朝會勞於應物一

也功成身退欲享其樂二也而吾之所以必留者三卿
以傑人之資開物成務世不可闕一也弼亮四朝更涉
變故謀無遺策二也名冠天下進退之間為國休戚三
也吾方盡養老之道殺禮以優賢廟堂之上猶有足樂
則夫卿之欲去者可回而吾之必留者蓋不可易也

賜太師文彥博乞致仕不許斷來章批荅

元祐二年

九月十一日

覽表具之為君難為臣不易非吾推誠無疑不能起卿

於安佚非卿忘身徇國不能從我於艱難召用之初中
外相慶搢紳莫不競勸父老至於涕流中道而歸其義
安在宜思一身之樂輕於社稷毋使庶人之議及於朝
廷

賜太師文彥博乞致仕不允斷來章批荅

元祐二年

九月十

一日

省表具之君子安身崇德如山嶽之鎮開物成務如江
河之流若山嶽之鎮動搖不安江河之流行止自便則

物將交病人亦何觀朕之望卿無以異此宜守不移之志以成可大之功

賜宰相呂公著上第一表乞致仕不允批荅

元祐

三年二月

二十八日

省表具之古者世臣譬之喬木粵自拱把至于棟梁傑然羣材之中夫豈一日之力卿擢自仁祖迨茲四朝光輔朕躬允有一德不獨卿無心而事自定抑亦民既信而功易成方今布在朝廷豈無豪傑之士猶當養以歲

月待其德望之隆卿雖欲歸勢未可去宜安厥位以副朕心

賜宰相呂公著上第一表乞致仕不許批荅

覽表具之卿三世將相一時著龜不求備以取人則房喬之比其經遠而無競有謝安之風用能寧輯我家靖共爾位政在元老人無異詞胡為厭事而求歸不復為國之長慮方今官冗財匱歲艱民貧天步難安國是未定若方勤於樸斲而遽易於工師人其謂何勢必不可

告老之請吾未欲聞

賜宰相呂公著上第二表乞致仕不許斷來章

批荅

元祐三年三月二十九日

覽表具之難進易退固君子之常節久勞思逸亦老者之至情然心存社稷則常節為輕身繫安危則至情可奪惟卿體國豈待多言苟大義之未安雖百請而何益宜安厥位勿復此辭

賜宰相呂公著上第二表乞致仕不允斷來章

批荅

元祐三年三月二十九日

覽表具之宰相不自用人主不自為予欲識人物之忠邪故以卿為水鏡予欲知利害之輕重故以卿為權衡苟明此心雖老猶壯與其輕去軒冕獨善其身孰若優游廟堂兼享其樂益敦此義勿復有云

賜新除依前中大夫守中書侍郎劉摯辭免恩

命不許斷來章批荅

元祐三年四月十二日

省表具之卿蹈道深遠守節淳固雖不留於儻來之物

而有志於行可之仕樂告以善勇於敢為進不求當世之名退不叛平生之學未嘗為枉尺直尋之事夫豈有見得忘義之嫌哉毋復過辭往踐乃事

賜劉摯辭免恩命不允斷來章批荅

元祐三年四月十二

日

省表具之朕纘服之初卿言責是任歷陳治道之要以立太平之基朕欲行其言遂授以政歲月未幾紀綱略陳欲究觀心術之微宜擢居政本之地苟無愧於允蹈

豈不賢於力辭徃服官箴勿違朕命

賜新除依前中大夫守尚書左丞王存辭免恩

命不許斷來章批荅

元祐三年四月十二日

省表具之夫志大有遠略器博無近用以卿忠義開濟
何施不宜今以次遷何足辭也益堅無倦之意以觀可
久之業

賜王存辭免恩命不允斷來章批荅

元祐三年四月十二日

省表具之夫陞簾之增所以隆堂與位次有敘所以尊朝廷朕既樂得於英才復以時而遷用庶幾華國非以寵卿祇率厥常毋廢朕命

賜新除守尚書右僕射兼中書侍郎范純仁上

第一表辭免恩命不允批荅

元祐三年四月十二日

覽表具之夫有烏獲之力然後可以付千鈞有和扁之功然後可以寄死生故宰相之任非所以寵人臣也無其德而當之為不智有其材而辭之為不仁若卿之才

德亦可謂稱矣往思其憂以稱天下之望

賜范純仁上第一表辭免恩命不許批荅

元祐三年

四月十一日

覽表具之吾聞之乃烈考曰君子先天下之憂而憂後天下之樂而樂雖聖人復起不易斯言卿將書之紳銘之盤盂以為一言而可以終身行之者歟則今茲爰立之命乃所以委重投艱而已又何辭乎

賜新除司空同平章軍國事呂公著上第二表

辭免恩命不許斷來章批荅

元祐三年四月十二日

省表具之夫國以得人為強如猛獸之衛藜藿以積賢為寶如珠玉之茂山川湛然無為物自蒙利故崔公發議則淄青慙服知朝廷之有人蜀使抗詞則孫權回顧歎張昭之不在得失之效豈可同日而語哉朕之用卿意實在此國計之重可無復辭

賜新除司空同平章軍國事呂公著上第二表

辭免恩命不允斷來章批荅

元祐三年四月十二日

省表具之周之詩曰無曰予小子召公是似唐之雅曰
惟西平有子惟我有臣夫父子君臣之間光明盛大如
此載之簡策被之金石豈獨閨門之寵足為邦國之華
再省來章具陳先烈雖朕寡昧不敢庶幾於仁祖而卿
忠孝當念服勤於世官祇率厥常毋違朕命

賜新除守尚書左僕射兼門下侍郎呂大防上

第二表辭免恩命不許斷來章批荅

元祐三
年四月

省表具之卿有夷狄盜賊之虞倉廩禮樂之歎陰陽風雨之憂此三者誠當今之大計朕之所以中夜不寐輟食太息者正為此也孟子曰責善於君謂之恭夫既以責其君而不以身任之者非仁人也願卿慨然當古人之重畧世俗之謙務踐斯言憂此三者

賜呂大防上第二表辭免恩命不允斷來章批

荅

元祐三年四月十二日

省表具之夫任賢使能天下之公議而辭大就小君子

之自守也惟名器爵祿朕所不敢授以私則勞謙退避卿豈得必行其意所謂唐虞三代信任之至以致稷契伊呂德業之隆若卿之言朕敢不勉請事斯語永觀厥成

賜新除守尚書右僕射兼中書侍郎范純仁上

第二表辭免恩命不許斷來章批荅

元祐三年四月

十二日

省表具之卿以明哲自託不能非獨以見君子勞謙之

光亦因以知前世用人之弊功烈無取誠如卿言夫次公減於治郡子元不如為將非獨文獻不足蓋其才德有偏如卿昔在朝廷首談孟軻之仁義旋為師守專行羊祐之威信慨有大志似其先人苟推此心施于有政則太平可望而小節可畧矣

賜范純仁上第二表辭免恩命不允斷來章批

答

元祐三年四月十三日

省表具之自昔先帝之世屢歎才難及朕嗣位以來專

用德選雖爵祿名器出於獨斷而長育成就實在群公
長短不遺輔相之責苟無為國養人之意必有臨事之
使之憂朕用慨然當食不御思得英雋之老共收文武
之朋惟卿篤於憂國明於知人灼見朕心宜在此位往
任天下之重毋事匹夫之廉

賜新除依前正議大夫守門下侍郎孫固辭免

恩命不許斷來章批荅

元祐二年四月十三日

省表具之卿奉事先帝有勸學之舊與聞機政有已試

之功固非躡等之遷獨恨用卿之晚勉循大義毋事小
廉

賜孫固辭免恩命不允斷來章批荅

元祐三年四月十三

日

省表具之卿向自西樞出殿藩服頃由近輔入侍燕閒
昔有未識之思今乃日聞其語既見君子無踰老臣當
益勵於初心尚何辭於新命

賜新除中大夫守尚書右丞胡宗愈辭免恩命

不許斷來章批荅

元祐三年四月十四日

省表具之卿自天官擢領風憲下有庇民之意上有愛君之忠度其不以利回是故可以大受丞轄之任非卿孰宜毋復固辭以就遠業

賜胡宗愈辭免恩命不允斷來章批荅

元祐三年四月

十四日

省表具之人才之難古今所病忠厚者多乏於用強濟者或涼於德有德適用如卿幾人方觀卿謀國之良以

成朕知人之美深體此意徃祗厥官

賜新除依前中散大夫充樞密直學士僉書樞

密院事趙瞻辭免恩命不允斷來章批荅

元祐

三年四月
十四日

省表具之君子之仕也喜於知而樂於用如卿之言結
髮從仕而白首遇合則君子之用舍進退蓋亦有時矣
勉行其道無失斯時苟能遇事而必為則亦立功之未
晚古人之事將見於卿

賜趙瞻辭免恩命不允斷來章批荅

元祐三年四月十四日

日

省表具之卿挺然孤忠白首一節逝將力求於退避夫豈有意於進取哉特以雅望既隆公議所在方將度才而授任固難越卿以用人往踐厥官毋違朕志

賜正議大夫知樞密院事安燾乞退不允批荅

元祐三年五月十八日

省表具之宥密之司安危所寄雖羌酋款塞少休烽燧

之虞而夏童跳邊猶煩筆策之馭翻然求去義有未安
夫以朕大烹優賢之資豈不能助卿養志之具足以毋
廢子職而能兼為國謀豈不休哉

賜正議大夫知樞密院事安燾乞退不許批荅

元祐三年五
月二十八日

省表具之乃眷西樞實參大柄吾欲兵民兼利戎夏兩
安自非宿業更變之臣懼有傷財玩寇之患卿當念先
朝委重之久未可以親庭歸養為詞勉安厥官以副吾

意

賜新除殿前副都指揮使武泰軍節度使苗授

上第一表辭免恩命不許斷來章批荅

元祐三年

七月十九日

省表具之試材已舊謀帥尤艱故以久次用人欲其深
練於事而卿辭以錮疾豈所望哉速即乃官毋復退避
賜新除殿前副都指揮使武泰軍節度使苗授

上第二表辭免恩命不允斷來章批荅

元祐三年

七月十九日

覽表具之環衛之嚴節制之重誕告多士以長萬夫朕
豈輕用其人哉確然固辭未喻厥指徃祗朕命毋曠乃
官

賜大師平章軍國重事文彥博上第一表乞致

仕不許批荅

元祐三年九月二日

覽表具之昔師尚父九十秉旄杖鉞猶未告老此諸葛
元遜所以屈張昭也而衛武公百年猶箴儆於國曰無

以我老耄而捨我此左史倚相所以誨申公也今鄉壽
考康寧而退托衰病自引求去獨不念天下之士有如
彼二子者議其後乎姑安厥官以荅公論

賜太師文彥博上第一表乞致仕不允批荅

元祐

三年九
月二日

覽表具之朕聞之成王之政周公在前召公在後畢公
在左史佚在右四子挾而維之目見正色耳聞正言一
日即位天下曠然未聞四子以老而求退亦未聞成王

以老而聽其去也朕雖不德猶庶幾成王之治卿雖老矣獨不能以四子之心為心乎勉卒輔朕無愧前人

賜新除守司空同平章事呂公著上第一表辭免恩命不允批荅

省表具之夫司空之官自唐以來雖無職事而孔子所謂天子有爭臣七人者三公首當之朕欲聞仁人之要言與天下之大計非此元老將安取斯卿其省思慮慎寢食優游廟堂為朕謀其大者

賜新除守尚書左僕射門下侍郎呂大防辭免
恩命不允批荅

省表具之夫天以斯民付人主而人主付之宰相若不
得人為慢天之所付朕敢乎哉如卿瑰姿偉望宏毅開
濟朕既用之不疑而卿自疑何也往脩厥官毋斁朕命
賜新除尚書左僕射兼門下侍郎呂大防上第
一表辭免恩命不許批荅

覽表具之自英廟擢卿於言責而先帝用卿於西師則

朝廷待卿之重蓋出於祖宗之意矣孔子曰吾之於人也誰毀誰譽如有所譽其有所試若卿者可謂屢試矣卿而不宜其孰宜之

賜新除守司空同平章事呂公著上表辭免不

許批荅

覽表具之天下之事使壯者治之老者謀之自堯舜以來未有易此者也今卿議政而不及事勞心而不及力吾自以為得養老之禮而不失用賢之實卿何辭之堅

也

生獲鬼章文武百寮稱賀宣荅詞

元祐二年八月二十八日

太皇太后

種羌叛換西鄙繹騷首出偏師遂擒元惡安邊之喜與卿等同之

皇帝

凶狡就俘羌戎一震既增吏士之氣亦寬戍守之勞靖寇息民與卿等同喜

八月二十八日入內高班蔡克明傳宣取批荅
宰臣以下賀生獲鬼章表


太皇太后

國家偃兵息民涵養中外鬼章無故犯順神人棄之雖
廟社無疆之休亦將相一心之助封章來上嘉歎不忘
皇帝

朕上承慈訓下盡羣策務漸寬於民力本無意於邊功
既狂狡之就擒知休息之有日再閱來奏嘉歎于中

東坡全集卷一百一十三

謹案卷一百十二第二十六頁前三行罷散坤成
節道場刊本脫道字今增



總校官庶吉士臣張能照

校對官庶吉士臣徐如澍

謄錄監生臣陳增

欽定四庫全書薈要

集部

東坡全集卷一百十四

五




詳校官助教臣常循

東坡全集卷一百一十四

宋 蘇軾 撰

內制表本一十八首

皇帝為冬節奏告永裕陵神宗皇帝表本

 伏以 歷紀天正史書日至感舒長於測景增怵惕於履霜恭惟謚號皇帝德邁堯仁功恢禹迹游衣冠於原廟徒仰威神望松柏於橋山永懷悲慕

皇太后殿夫人為冬節往永裕陵酌獻神宗皇

帝表本

伏以一陽來復萬物懷生空臨觀祲之辰無復稱觴之
慶恭惟謚號皇帝道齊覆載德冒華夷從南狩於蒼梧
神游已邈望西陵於銅雀涕慕空深

皇帝為十一月一日奏告永裕陵神宗皇帝旦
表本

伏以始饒餘寒復興嗣歲望寢園而增慕悼日月之不
留恭惟謚號皇帝道貫百王澤涵萬宇永瞻帝所之樂

坐起堯牆之悲饋奠莫由馳誠罔極

皇太后殿夫人為年節往永裕陵酌獻神宗皇
帝表本

伏以葦桃在戶徒講三朝之儀椒栢稱觴無復萬年之
壽恭惟謚號皇帝功施無外德洽有生隨鼓漏於寢園
莫親饋奠望衣冠於原廟空極涕流

皇帝為三月一日奏告神宗皇帝旦表本

伏以既成春服時方禋洛之初祗謁寢園古有薦鮪之

禮恭惟謚號皇帝配天立極如日載陽仰餘一作陰澤之

旁流致群生之遂茂光靈愈遠涕慕空深

皇帝為神宗皇帝大祥往永裕陵奏告表本

伏以寢廟告成永動廓然之感柏城森列遽興拱矣之
悲恭惟謚號皇帝澤浸函生慶垂後裔配天無極奉謨
訓以長存示民有終悵神游之安在恭脩祥奠莫訴哀
誠

皇帝為神宗皇帝大祥內中奏告表本

伏以追號罔極實抱終身之憂祥禪有期蓋追先王之
禮恭惟謚號皇帝睿明照世神智自天雖清廟肅雍瞻
之莫見而威顏咫尺凜然常存悲慕之深華夷所共

皇太后殿夫人為神宗皇帝大祥往永裕陵酌
獻表本

伏以飈馭上賓日以遠矣隙駒遄邁祥而廓然恭惟謚
號皇帝道加家邦化刑夷夏天地之運固代謝於陰陽
草木何知徒興悲於霜露莫親饋奠惟極哀誠

十月朔本殿夫人往永裕陵酌獻神宗皇帝表

本

雨霜隕穽感閉塞於天時收潦滌場思艱難於王業恭
惟尊謚皇帝禹功紀地堯則惟天威加四夷尚餘肅物
之凜仁及萬彙永同挾纁之溫省奉無期瞻懷靡極

永安永昌永熙永裕陵忌辰奏告宣祖太祖太
宗神宗皇帝表本

伏以卜年之永恩浹於華夷諱日之臨感深於臣子恭

惟謚號皇帝文武經世威靈在天每更不樂之辰尚有
遺弓之慕山陵永望雨露增懷

永安永昌永熙陵忌辰奏告昭憲孝惠孝明孝
章淑德懿德明德元德章懷章穆章懿章惠
章獻明肅皇后表本

伏以周南之化刑恭儉於多方渭北之游極望思於原
廟恭惟謚號皇后道應圖史德參聖神顧明發之永懷
仰徽音之如在載瞻園寢想見衣冠

皇太后殿內人為神宗皇帝忌辰朝永裕陵表

本

伏以百年之思化被於無疆終身之憂感深於不樂恭
惟謚號皇帝德齊堯禹功陋漢唐道蓋始於正家謀方
貽於燕翼追攀罔極慨慕徒深

永裕陵正月旦表本

伏以賓出日於暘谷堯歷方頒朝計吏於原陵漢儀具
舉恭惟謚號皇帝功恢禹迹德邁湯仁雖歲月之屢遷

想威神而如在載瞻園寢空極望思

永裕陵二月旦表本

伏以時方啟蟄禮及獻羔感清衍之協風怵懷思於濡
露恭惟謚號皇帝文武緯世聖靈在天岱嶽泥金永講
升中之禮荆山鑄鼎遽成脫屣之游永望寢園徒增感
慕

永裕陵四月旦表本

伏以日躔昴畢卦直乾離物蒙長養之仁世載文明之

化恭惟謚號皇帝功成不宰德範無窮執炎帝之衡莫
追往躅秩南郊之政空守成規祇望寢園惟增感慕

永裕陵十月旦表本

伏以戒寒墜戶脩及於秦正前晦行陵祇循於漢禮恭
惟謚號皇帝懿文緯世厚德載時休老勞農追述養民
之政厲兵講武敢忘經國之謀永望寢園益增感慕

永裕陵十二月旦表本

伏以商正紀歷大呂旋宮論時令以待來歲之宜獻民

力以共宗廟之祀恭惟謚號皇帝至仁無外全德難名
文物聲明但覩乘時之迹昆虫草木孰知成歲之功急
景易遷永懷何極

內制國書一十七首

皇帝達太皇太后賀大遼正旦書

元祐元年
十月二日

肇易歲元發新榮於萬物仰遵慈誨脩舊好於兩朝遠
飭使軺肅將禮幣庶迎壽祉式副願言

皇帝賀大遼皇帝正旦書

元祐元年
十月缺日

獻歲發春共講三朝之慶寶隣繼好茂膺五福之祥申
飭使車往陳信幣永言欣頌曷罄諭陳

皇帝達太皇太后回大遼皇帝賀正旦書

元祐二年

正月五日

百年之好既講於春朝萬壽之儀兼陳於幄殿恭因省
侍具述來音感懌之懷言宣莫罄

皇帝回大遼皇帝賀正旦書

元祐二年正月五日

東風協應感徂歲之更新遠使交馳導歡言而如舊榮

然禮幣申以書詞欣懌之深敷陳罔究

皇帝達太皇太后回大遼皇帝賀坤成節書

元祐

二年

七月

嘉月令辰篤生壽母珎函重幣交慶寶鄰已恭致於德音復欽傳於慈旨其為感懌未易名言

皇帝回大遼皇帝問候書

元祐二年七月

四牡載馳遠勤於使介尺書為問申講於隣歡方履素秋克膺純福益祈保護式副願言

皇帝達太皇太后賀大遼皇帝生辰書

元祐二年

寒律既周誕辰載紀恭被慈闈之誨俾脩慶幣之儀永介壽康式符頌禱更祈調衛以副願言

皇帝賀大遼皇帝生辰書

元祐二年

太呂還宮攝提正丑載協誕彌之慶永膺壽考之祥臨遣使輶往陳信幣其為欣禱莫盡名言

皇帝達太皇太后賀大遼皇帝正旦書

元祐二年

歲聿肇新鄰歡載講恭被慈闈之誨遠通慶幣之誠益

冀保頤永綏壽嘏

皇帝賀大遼皇帝正旦書

三陽朋來慶二儀之交泰兩朝繼好納萬民於阜昌申
勅使車肅將禮幣願符善禱永介純釐

皇帝回大遼皇帝賀興隆節書

元祐二年十月

誕日載臨鄰懽歲講封疆雖遠晷刻不踰惟信睦之交
脩識情文之兩至益深雅好良極欣悰

皇帝達太皇太后回大遼皇帝問候書

元祐二年十月

嘉平紀月震夙惟時屬茲慶使之來重以慈闈之問尋
因省侍悉致誠言欣感之深敷陳罔究

皇帝回大遼皇帝賀正旦書

元祐三年

獻歲發春方祝永年之慶睦隣敦好益修奕世之歡信
幣精華書詞溫綢再維雅契良極欣悰

皇帝達太皇太后回大遼皇帝賀正旦書

元祐三年

正歲履端遠勤於華使慈闈申慶重領於玆函省侍之
餘誠言已達永惟欣感莫究言宣

皇帝回大遼皇帝賀興龍節書

世睦寶鄰申以無窮之好歲馳華使及茲載夙之辰閱
詞幣之兼隆識情文之備至願言欣感難悉究陳

皇帝達太皇太后回大遼皇帝問候書

遣使為壽既欣鄰好之修因書見誠兼致慈闈之問侍
言有次來意畢陳感懌之深敷陳罔既

皇帝達太皇太后回大遼皇帝賀坤成節書

元祐

四年
七月

星火西流慶慈闈之誕日皇華北至講鄰國之誠言既
達來音俾修報禮感銘之素敷述難周

皇帝回大遼皇帝問候書

元祐四年七月

輶車重幣已修交慶之儀尺素好音復講久要之信屬
臨素節允迪純禧益冀保頤式符企詠

內制青辭十首

集禧觀開啟祈雪道場青詞

元祐元年二月六日

伏以麥將覆塊雪未掩塵嗣歲之憂下民安訴具嚴法

會祇款閼宮仰冀同雲溥滋新臘

景靈宮宣光殿奉安神宗皇帝御容日開啟道

場青詞

元祐二年三月十四日

伏以天鑒不遠誠感則通方寶構之肇新宜神游之降格具嚴法席高味靈篇內安清淨之居外錫烝黎之福

集禧觀開啟祈雨道場青詞

元祐二年三月二十五日

洞淵龍王水府聖衆饑饉之患民流者朞年吁嗟之求詞窮於是日乃眷陰靈之宅實為雲雨之司涵濡之功

指顧而辦罔吝天澤以答民瞻

集禧觀洪福殿等處罷散謝雨道場青詞

德有愧於動天敢辭屢請道無私而應物豈間微誠霈
一雨以咸周起三農於既病仰承靈貺莫報深仁

太皇太后皇太后皇太妃受冊奏告景靈宮等

虞青詞

元祐二年七
月十九日

伏以祗事親闈庶幾孝治配德祖考既務極於推崇篤
生眇冲亦敢忘於褒顯將奉寶冊率循舊章徼福于神

先期以告

神宗皇帝御容進發前一日奏告諸宮觀等處

青詞

元祐二年九月二十五日

嵩洛之間山陵所在嚴道釋之淨宇奉衣冠之別祠恭
擇良辰啟行仙馭敢徼福於群聖庶流祉於含生仰叩
真靈與垂昭鑒

隆祐宮設慶宮醮青詞

元祐二年

伏以長樂告成光動紫宮之象清都下照誠通絳闕之

金方口人卷一百一十四
僊祇率多儀肅陳菲薦永惟慈孝之本克享天人之心
介萬壽之無疆錫五福之純備

西嶽廟開啟祈雨道場青詞

元祐三年七月十三日

伏以二華之尊作鎮於西極兆人所急望歲於秋成穀
既日滋雨不時霈敢以病告于我有神閔茲將槁之苗
賜以崇朝之澤惟神之德非我敢忘

中太一宮真室殿開啟天皇九曜消災集福道

場青詞

臣以冲眇嗣承列聖之休濟于艱難實賴文母之德臨蒞四載勤勞百為畏天之威未嘗終日而豫怠視民如子惟恐一夫之困窮伏願上帝降祥衆真垂佑消禳災沴永底壽康恭陳寶錄之科仰扣神游之館敢祈昭鑒下察孝心

皇太妃宮閣慶落成開啟道場青詞

伏以良辰襲吉華構一新仰荷褒崇之私得伸鞠育之報落成告備法會有嚴請命上穹馳神真聖庶精誠之

必達錫壽祉於無窮

內制朱表三首

景靈宮宣光殿奉安神宗皇帝御容罷散朱表

元祐二年三月十四日

馭風雲闕既參日月之光弭節琳宮尚答神民之望爰
開法會庶歎真庭願推往聖之心永錫函生之福

集禧觀洪福殿罷散謝雨道場朱表

早暝為災禱求屢瀆賴神之賜霈澤以時蓋至道之無

私豈不德之能致載陳謝懇少荅靈休

中太一宮真室殿為太皇太后消災集福罷散

天皇九曜道場朱表

元祐三年

仁者必壽信惟天地之心孝無不通宜從臣子之欲虔
遵道範仰扣真廷庶同海宇之誠上集慈闈之福天威
咫尺求聰明於我民聖壽萬年定子孫于下地更推博
施普及函生

內制疏文一首

景靈宮罷散奉安神宗皇帝御容道場功德疏

文

元祐二年
四月七日

伏以肇新寶構祗奉睟容脩妙供於珠庭結勝緣於淨
衆真游永奠法會告成普冀含生悉蒙餘祉

內制齋文一十七首

冬至福寧殿作水陸道場資薦神宗皇帝齋文
伏以聖神陟降釋梵後先適更來復之辰茂薦往生之
福虔脩淨供仰冀真游

正旦於福寧殿作水陸道場資薦神宗皇帝齋

文

伏以棄黃屋以上賓莫追風馭抱烏號而永慕再歷春
朝敢仗勝緣式開淨供仰頌義堯之德永追梵釋之游
在京諸宮觀開啟神宗皇帝大祥道場齋文

伏以密音如昨新穀再升望仙馭於帝鄉陳法筵於淨宇
人天來會共脩最勝之緣梵釋同游永錫無疆之慶

垂拱殿開啟神宗皇帝大祥道場齋文

伏以喪期有數方歎於壑舟法海無邊聊資於岸棧有
嚴秘殿恭啟淨筵時御六龍徘徊宮闕永同千佛陟降
人天

內中福寧殿下寒節為神宗皇帝作水陸道場
齋文

伏以甚雨疾風感春律之將變錯燧改火悼喪期之不
留爰啟淨筵以資冥福願登大覺永濟函生

景寧宮宣光殿奉安神宗皇帝御容日開啟道

場齋文

伏以祠宮夙啟真室告成仗勝會於佛僧導靈游於梵
釋更推餘祉旁及含生

大相國寺開啟祈雨道場齋文

伏以旱暵既久麥禾將空仰惟天人之師宜專雲雨之
施庶幾愍愍寬我憂危

鄭州超化寺祈雨齋文

伏以常暘為災歷時愈熾秋穀未熟夏苗將空天意未

回佛慈所愍願以不思議智力大解脫神通時興法雲
普賜甘澤

鄭州超化寺謝雨齋文

等慈應物不倦於禱求神智無方何難於膏澤旱沴既
弭農民其康仰惟不宰之功豈待有為之報爰脩淨供
少達純誠

十月一日永裕陵下宮開啟資薦神宗皇帝道
場齋文

橋山永望莫瞻弓劍之餘陽月載臨徒增霜露之感招
延淨衆崇建梵筵庶集勝因仰資真馭

西京會聖宮應天禪院奉安神宗皇帝御容禮
畢開啟道場齋文

原廟告成神游既奠雖聖靈之無礙對越在天從世法
之有爲歸依於佛普願幽明之域悉登淨妙之庭集此
勝因以資仙馭

後苑瑤津亭開啟祈雨道場齋文

六月徂夏方金火之爭三農望秋之雷雨之施嗟人何
罪逢歲之艱自非妙覺之等慈孰極疲民於重困有嚴
禁苑祇建淨筵念我憂勞錫之膏澤非獨起焦枯於田
野抑將掃疾疫於里閭嘉與含生永均介福

後苑瑤津亭開啟祈雨道場齋文

伏以常暘之沴歷月于茲近自都畿遠及關輔豈獨西
成之害將為宿麥之憂仰止覺慈必垂善救普集山川
之守來登梵釋之筵罔吝膏濡以興焦槁

後苑瑤津亭開啟謝雨道場齋文

伏以祗畏之心格人天於影響覺慈之力反水旱於屈伸周澤載濡農田告足既解蘊隆之患庶無流潦之虞仰冀能仁曲垂昭鑒

顯聖寺壽聖禪院開啟太皇太后消災集福粉壇道場齋文

伏以躬儉節用本嚴房闔之風遺大投艱猥當廟社之寄常恐德之弗類以召災于厥身敢即仁祠肆陳淨

供恭延梵釋普施人天俾壽而康非獨輔安於寡昧與
民同利固將燕及於華夷仰冀能仁曲垂照鑒

靈景宮宣光殿開啟神宗皇帝忌辰道場齋文
伏以至德難名已立配天之極孝思永慕蓋有終身之
憂惟是佛乘庶資冥福屬弓劍上賓之日就衣冠出游
之庭虔設淨筵俾嚴勝果庶超直覺永庇含生

奉宸庫翻修聖宇等庫了畢安慰土地道場

齋文

伏以貨幣所藏有壞必葺聰直之鑒既成乃安爰仗
佛慈以綏神守庶期昭格永底純熙

內制祝文三十三首

奏告天地社稷宗廟宮觀寺院等處祈雨雪

青詞齋祝文

伏以基年以來水旱作沴迨茲徂歲復苦常暘疾疫將
興農末俱病方齋居而默禱庶精意之登聞敢祈春臘
之交沛然雨雪之賜願均介福敷錫群生

五嶽四瀆等處祈雪祝文

伏以歷冬不雪兩歲之憂疾癘將興麥麴就槁分命守
土告于有神下民其咨天聽不遠毋愛同雲之澤以成
盈尺之祥苟利于民敢忘其報

內中添蓋諸帝后神御殿告遷御容權奉安於
慈氏殿祝文

於皇神考肇啟閔祠方增築之未寧懼格思之有瀆別
嚴淨宇祇奉睟容式燕聖靈永綏慈嘏

內中慈氏殿告遷神御於新添脩殿奉安祝文
伏以增築告成閼闔有真儼衣冠之來復愾歎息之疑
聞昭格穆清永綏燕翼

景靈宮奉安神宗皇帝御容祝文

伏以恭承仙馭奄宅殊庭聲海宇以駿奔儼人天之景
從願回日月之照少荅神民之心乃眷新宮永垂餘慶
天章閣權奉安神宗皇帝御容祝文

伏以唐虞稽古雖絕名言文武重光已新崇構下慰華

夷之望仰慕天日之容將往宅於靈宮永懷攀慕願少
安於秘殿無盡瞻依

內中神御殿張挂奉安神宗皇帝御容祝文

伏以祥祭告終聖靈改御優如在位威不違顏雖天日
之光固難形似而神人之奉永有瞻依悲慕愈深照臨
無極

神宗皇帝大祥祭訖徹饌除靈座時皇帝躬親
扶神御別設一祭祝文

伏以俛就終喪禮當即遠永瞻陵廟將徹几筵攀慕若
疑追懷罔極

景靈宮宣光殿奉安神宗皇帝御容畢皇太后
親詣行禮祝文

伏以奕奕祠宮巍巍天像聖靈雖遠哲命惟新仰瞻如
在之威永錫無疆之慶敢祈昭鑒下燭微誠

天地社稷宗廟神廟等處祈雨祝文

惟德弗類致常暘之災斯民何辜有荐饑之懼旬浹不

雨麥禾皆空循省再三夙夜祇慄引領雲霓之望援手
溝壑之餘既窮之詞其忍弗聽

五嶽四瀆等處祈雨祝文

期年以來水旱作沴振廩同食冠蓋相望已責勸分公
私並竭惟待一熟之麥以蘇垂死之民而冬不雨以徂
春苗將秀而不實顧惟冲昧有失政刑感傷陰陽延及
鰥寡既非下民之罪亦豈上帝之心惟神聰明毋愛膏
澤則民有息肩之漸神無乏祀之憂

五嶽四瀆等處祈雨祝文

天人之交應若影響雨暘不順咎在貌言失之戶庭害
及寰宇求治雖切不當天意之中聽言雖多未聞民病
之實刑罰有過賦役未平一人之愆百姓何罪避坐徹
膳猶當許其自修悔旣轉災庶或救之將墜於神蓋反
掌之易而民免擠壑之憂仰瞻雲霓待命旦夕

五嶽四瀆等處謝雨祝文

乃者常暘為災歷時愈熾念咎責已寧丁我躬求哀籲

天並走群望果蒙膏澤之賜一拯流亡之餘我愧于民
敢廢無災之懼神終其賜願必有年之祥

神宗皇帝禪祭太皇太后親行祝文

寒暑之變忽焉再暋練祥之餘復將三月勉從即吉之
典莫遂無窮之哀

神宗皇帝禪祭皇帝親行祝文

既祥之餘徙月而吉迫於先王之禮徒有終身之憂瞻
仰聖靈伏深感慕

神宗皇帝禪祭皇太后親行祝文

喪期有數禪月告終哀雖未忘禮弗敢過追慕之至中外所同

永裕陵修移角堦門戶栢窠奏告神宗皇帝祝文

園寢之奉巡行以時增植所宜卜云其吉先事而告亦禮之常

永裕陵修移角堦門戶栢窠祭告土地祝文

寢園之奉栽植以時惟爾有神實嚴所守敢祈昭鑒永
底平寧

景靈宮天興殿開淘井眼祭告里域真官祝文
神游之庭井泥不食日辰之吉浚治以時諗爾明靈庶
無悔咎

太皇太后皇太后皇太妃受冊奏告太廟并諸
陵祝文

伏以祗事親闈庶幾孝治配德祖考既務極於推崇篤

生眇冲亦敢忘於褒顯將奉寶冊率循舊章涓日甚良
先期以告

西京應天禪院會聖宮修神御帳座畢功告遷
諸神御祝文

頃詔有司恭修幄座暫安別殿以作庶工既匠事之告
成宜真游之來復願垂昭鑒及此良辰

西京應天禪院會聖宮修神御帳座畢功奉安
諸神御祝文

幄坐告成允協歲時之吉靈游永奠復瞻天日之光庶
俾後人仰蒙餘慶

西京會聖宮應天禪院奉安神宗皇帝御容前
一日奏告永裕陵祝文

國家推本漢儀立郡國之廟參用唐制就佛老之祠乃
眷洛都載瞻園寢並興靈宇以奉神嬉閔惟冲人恭蹈
成憲謹擇良日臨遣近臣庶回日月之光少答人天之
望

神宗皇帝御容至會聖宮并應天禪院前一日

奏告諸帝祝文

三靈眷命六聖在天崧洛之間仙釋所館惟茲吉禘之
始當祔出游之庭念彼元臣昔皆侑食一新惟肖之像
永陪如在之神敢冀威靈曲垂昭鑒

神宗皇帝御容進發前一日奏告天地社稷宗
廟等處祝文

祇畏天明率循祖武進衣冠之原廟鎮崧洛之靈祠恭

擇良辰啟行仙馭分遣執事並告有神

生擒西蕃鬼章奏告永裕陵祝文

大獮獲禽必有指蹤之自豐年高廩孰知耘耔之勞懞
彼西戎古稱右臂自嘉祐末木征擾邊至熙寧中董氈
方命於赫聖考恭行天誅非貪尺寸之疆蓋為民除莠
暨遂建長久之策不以賊遺子孫而西蕃大首領鬼章
首犯南川壯連拓拔申命諸將擇利而行旋聞偏師無
往不克吏士用命爭酬未報之恩聖靈在天難逃不漏

之綱已於八月戊戌生獲鬼章頡利成擒初無渭水之
恥郅支授首聊報谷吉之寃謹當推本聖心益修戎略
務在服近而來遠期於偃革以息民仰冀威神曲垂昭
鑒

西京會聖宮應天禪院奉安神宗皇帝御容奏
告諸帝祝文

於穆神考陟配在天有嚴祠宮從祀我祖時日協吉聖
靈其安寵綏後人永錫純嘏

西京應天禪院會聖宮奉安神宗皇帝御容祝

文

於皇在天丕冒下土矧此山陵之近顧瞻兩都宅於嵩
洛之間上聯五聖有嚴淨宇

會聖宮改為真館

祇奉睟顏願追

梵釋之遊

會聖宮改為仙聖之遊

永答人天之望

太皇太后皇太后皇太妃受冊禮畢奏謝天地
社稷宗廟諸宮觀并諸陵青詞齋祝文

至哉坤元政必先於治內養以天下孝莫大於尊親昔

首正於號名今復嚴於典冊禮樂既具神人允諧分命
邇臣恭致成事仰祈昭鑒永錫鴻休

諸神廟分命邇臣
句改分命有司

東太一宮翻修殿宇奏告十神太一真君祝文
於穆祠宮有嚴春祀吏以時而按視工揆日以修完庶
就絜新永綏靈御仰祈昭鑒大庇含生

西路闕雨於濟瀆河瀆淮瀆廟祈雨祝文

伏以水旱之事山川所司農服穡以有秋天密雲而不
雨愧我不德瀆于有神願為三日之霖大慰一方之望

國有常報我其敢忘

永定院修蓋舍屋奏告諸帝后祝文

具嚴淨宇祇奉寢園眷惟焚燎之餘少緩增修之役仰
祈昭鑒永底燕寧

永定院修蓋舍屋祭告土地祝文

伏以向因遺燼延及淨祠爰擇良辰以興衆役宜茲遣
使詔示有神

內制祭文一十四首

太皇太后祭奠故夏國主祭文

乃眷外臣嗣守西服襲累世之忠順荷先朝之寵光惟
天難忱錫命不永訃音遽至閔悼良深特遣使車往陳
奠幣庶此恩禮貫于幽明

故皇叔祖昭信軍節度使檢校司空開府儀同
三司漢東郡王宗瑗堂祭文

惟王之生令德孝恭云何不淑罹此閔凶無復會朝載
惻予衷往奠其寢維以飾終

故皇叔祖昭信軍節度使檢校司空開府儀同
三司漢東郡王宗瑗下事祭文

嗚呼死生之變賢愚莫逃日月有時義當即遠哀榮之
極禮以告終來舉奠觴往安窀穸

皇叔故魏王啟殯祭文

惟靈襲累朝之餘慶兼天下之達尊祖送之儀哀榮斯
極永惟宅兆之卜未逢歲月之良叅酌時宜遷神郊館
啟殯之始寓哀斯文

皇叔故魏王外殯前一夕夜祭文

惟王之生孝友仁慈既沒元身舉國懷思矧予冲眇義
兼父師天不我遺日月如馳出次近郊寓此仁祠親奠
莫及寧知我悲

皇叔故魏王下事祭文

惟靈出就外郎二年于茲一日不見企予望思矧此告
終月逝日遠雖云近郊寧復旋返築室祠宮既固既完
雖非永歸亦可少安嗚呼哀哉

故贈太師追封溫國公司馬光安葬祭文

嗚呼元豐之末天步惟艱社稷之衛中外所屬惟是一
老屏予一人名高當世行滿天下措國於太山之安下
令於流水之源歲月未周綱紀略定天若相之又復奪
之殄瘁不哀古今所共知之者神考用之者聖母馴致
其道太平可期長為宗臣以表後世徃奠其葬庶知予
懷

故渭州防禦使宗孺出殯一夕祭文

惟靈飭躬寡過秉德不回莫克永年遂即長夜哀榮之
典國有故常死喪之戚予惟惻愴

故渭州防禦使宗孺下事祭文

嗚呼宗枝之秀罹此降災日月有時禮當即遠奄臨窀
穸肆設几筵徃致予哀來歆此奠

故聽宣劉氏堂祭文

奉侍有年肅雍靡懈今其亡矣良用惻然沒而有知來
舉茲奠

故聽宣劉氏墳所祭文

盡瘁內職歸全近郊既掩諸幽往致斯奠責其窀穸極
爾哀榮

故尚宮吳氏墳所祭文

惟爾之生服勤乃事逢日之吉歸全于郊式榮其終往
致斯奠

故尚服劉氏堂祭文

惟靈選備禁廷服勤內職逮茲淪謝良用愍傷饋奠之

儀哀榮兼至

故尚服劉氏墳所祭文

惟靈服勤有年罹命不淑窀穸之事日月有時念爾永歸歆予一奠

內制導引歌辭二首

奉安神宗皇帝御容赴景靈宮導引歌詞

帝城父老三歲望堯心天遠玉樓深龍顏髣髴笙簫遠
腸斷屬車音離宮春色瑣瑤林雲闕海沉沉遺民猶唱

當時曲秋鴈起汾陰

迎奉神宗皇帝御容赴西京會聖宮應天禪院

奉安導引歌詞

經文緯武十有九年中遺烈震羌戎渭橋夾道千君長
猶是建元功西瞻溫洛與神崧蓮宇照瓊宮人間俛仰
成今古流澤自無窮

東坡全集卷一百一十四

東坡全集卷一百一十五

宋 蘇軾 撰

樂語十六章

春貼子詞

元祐三年

皇帝閣六首

藹藹龍旂色琅琅木鐸音數行寬大詔四海發生心
暘谷賓初日清臺告協風願如風有信長與日俱中
草木漸知春萌芽處處新從今八千歲合抱是靈椿

聖主憂民未解顏天教瑞雪報豐年蒼龍掛闕農祥正

慶一作老穉相呼看藉田

昨夜東風入律新玉關知有受降人聖恩與解河湟凍
得共中原草木春

翰林職在明光裏行樂詩成拜舞中不待驚開小桃杏
始知天子是天公

太皇太后閣六首

琬刻春何力欣榮物自知發生雖有象覆載本無私

小殿黃金榜朱簾白玉鈎一聲雙日蹕春色滿皇州
仗下春朝散宮中晝漏稀兩廂休侍御應下讀書帷
五日占雲十日風憂懃終歲為三農春來有喜何人見
好學神孫類祖宗

共道十年無臘雪且欣三白壓春田盡驅南畝扶犁手
稍發中都朽貫錢

不獨清心能省事應緣克己自消兵傳聞塞外千君長
欲趁新年賀太平

皇太后閣六首

寶冊瓊瑤重新庭松桂香雪消春未動碧瓦麗朝陽
瑞日明天仗仙雲擁壽山倚欄春晝永金母在人間
朝罷金鋪掩人間寶瑟塵欲知慈儉德書史樂青春
仙家日月本長閒送臘迎春豈亦然一作偶翠管銀罌傳
故事金花綵勝作新年

彤史年來不絕書三朝德化婦承姑宮中侍女減珠翠
雪裏貧民得袴襦

邊庭無事羽書稀
閒遣詞臣進小詩
共助至尊歌喜事
今年春日得春衣

皇太妃閤五首

葦桃猶在戶椒栢已稱觴
歲美風先應朝回日漸長

甲觀開千柱飛樓擢九層
雪殘烏鵲喜翔舞下觚稜

孝心日奉東朝養健德應師大練

一作太妃

風太史新年瞻

瑞氣四星明潤紫宮中

九門掛月未催班
清禁風和玉漏閒
崇慶早朝銀燭下

珮環聲在五雲間

東風弱柳萬絲垂的皪殘梅尚一枝
璽館乍欣蠶浴後
禡壇猶記燕來時

夫人閣四首

綵勝縷新語酥槃滴小詩
昇平多樂事應許外庭知
細雨曉風柔春聲入御溝
已漂新荇沒猶帶斷水流
扶桑初日映簾昇已覺銅餅暖不冰
七種共挑人日菜
千枝先剪上元燈

雪消鴛瓦已流澌
風暖犀盤尚鎮帷
縹渺紫簫明月下
壁門桂影夜參差

端午貼子詞

元祐三年

皇帝閣六首

盛德初融後潛陰
未姤時侍臣占易象
明兩作重離
採秀擷羣芳
爭儲百藥良
太醫初薦艾
庶草驗蕃昌
微涼生殿閣
習習滿皇都
試問吾民愠
南風為解無
西檻新來玉宇風
侍臣茗盞得雍容
庭槐似識天顏喜

舞破清陰作兩龍

講餘交翟轉回廊始覺深宮夏日長揚子江心空百鍊
只將無逸鑑興亡

一扇清風灑面寒應緣飛白在水紈坐知四海蒙膏澤
沐浴君王德似蘭

太皇太后閣六首

漸臺通翠浪暑殿轉清風簾捲東朝散金烏未遽中
日永蠶收簇風高麥上揚朝來籍田令振黍獻時芳

舞羽諸羌伏銷兵萬彙蘇只應黃紙誥便是赤靈符
令節陳詩歲歲新從臣何以壽吾君願儲醫國三年艾
不作沉湘九辨文

忠臣諒節今千歲孝女孤風滿四方不復巫陽占郢夢
空餘仲御扣河章

長養恩深動植均只憂貪吏尚殘民外廷已拜臬羹賜
應助吾君去不仁

皇太后閣六首

露簾琴書冷
琱槃餐餌新
深宮猶畏日
應念暑耘人
萬壽菖蒲酒
千金琥珀盃
年年行樂處
新月掛池臺
翠筒初室棟
鄉黍復經菰
水殿開冰鑑
瓊漿凍玉壺
秘殿扶踈夏
木深雨餘初
有一蟬吟應
將羸女乘鸞扇
更助南風長
棘心

上林珍木暗
池臺蜀產吳
包萬里來不
獨槃中見盧橘
時於櫻裏得楊梅

閔楚遺風萬
古情湘沅舊
俗到金明翠
輿黃繖何時幸

盡鷁飛兒盡日橫

皇太妃閣五首

午景簾櫳靜薰風草木酣誰知恭儉德綵縷出親蠶
雨細方梅夏風高已麥秋應憐百花盡綠葉暗紅榴
辟兵已佩靈符小續命仍縈綵縷長不為祈禳得天助
要隨風俗樂時康

玉盆沉李灑清泉金鴨噓空裊細煙自有梧楸郭畏日
仍欣麥黍報豐年

良辰樂事古難同繡重朱絲奉兩宮仁孝自應禳百沴
艾人桃印本無功

夫人閣四首

肅肅槐庭午沉沉玉漏稀
皇恩樂佳節鬪草得珠璣
節物荆吳舊嬉游禁掖閒
仙風隨畫簫拜賜落人間
五綵綰筒林稻香千門結
艾鬢髯張旋開寶典尋風物
要及靈辰共祓禳

欲曉銅餅下井欄
鏗鏘金殿發清寒
似聞人世南風熱

日上墻東問樂竿

內中御侍以下賀冬至詞語

元祐二年十月二十日

皇帝

伏以月臨天統首冠於三正氣應黃宮復來於七日君
道寢長陽德光亨恭惟皇帝陛下清明在躬仁孝遍物
垂衣南面天何言而四時成問學西清日將旦而群陰
伏裔夷奔走年穀順成豈惟四海之歡心自識三靈之
陰贊如川方至受命無疆妾等待罪掖庭備員婦職共

卷一百一十五
慶一陽之節敢陳萬歲之觴

太皇太后

伏以消長有時候微陽之來復賢愚同慶知君子之彙
征德化所加神人並應恭惟太皇太后陛下睿明天縱
慈儉身先振河嶽以不傾地無私載順陰陽而自化天
且不違成功已陋於漢唐論德蓋高於任姒大有上吉
方獲助於三靈既醉太平當純備於五福妾等職叅長
御心奉慈闈慶陽德之朋來願天壽之平格

皇太后

伏以矇眊奏功驗人和於緹室日官占物效歲美於黃
雲慶自宮庭澤均海宇恭惟皇太后殿下輔佐內治儀
刑王家推美國風夙茂周南之化考祥義易共成坤厚
之功方迎日於三微敢稱觴於萬壽豈獨宮闈之願實
同中外之驩宴等猥以微軀被蒙慈渥仰獻岡陵之祝
庶殫草木之誠

內中御侍以下賀年節詞語

元祐二年十
二月一日

皇帝

伏以齊七政於璣衡天人並應受三朝之圖籍海宇來
同恭惟皇帝陛下至仁無私神武不殺祖述堯帝歷象
以授民時儀刑文王正家而齊天下方肇新於歲律宜
嚮用於神休妾等幸侍禁嚴仰陶化育願上萬年之壽
永膺百順之祥

太皇太后

伏以太族旋宮既贊揚而出滯勾芒司歷方布德以緩

刑恭惟太皇太后陛下化始六宮風行九有捐財振廩
救民溝壑之中求賢審官拔士節茨之下方履端之資
始膺景福於無疆妾等幸侍禁嚴粗供婦職願獻岡陵
之壽少輸草木之誠

皇太后

伏以三元資始礪襮以饒餘寒萬寶更新燔烈以興嗣
歲恭惟皇太后殿下道光為內德配周南輔導兩朝孝
慈格於上下儀刑九御恭儉聞於邇遐順履三陽誕膺

百祿妾等幸班禁掖久被餘光莫報生成之恩但祝靈
長之算

內中御侍已下賀冬至詞語

元祐三年十月三十日

皇帝

伏以日合天統時推建子之正律中黃鍾氣驗微陽之
應德施自上惠均於民伏惟皇帝陛下道配皇王化行
夷夏觀其來復見乎天地之心靜以無為待此陰陽之
定雲物告瑞宮聲協和豈惟至治之祥自得上天之祐

一人有慶萬壽無疆妾等蒙被天光叨塵婦職敢獻如
山之祝庶同率土之歡

太皇太后

伏以書奏清臺驗厯象之邃密日移黃道迎化國之舒
長寰宇和平宮闈歡豫恭惟太皇太后陛下教隆陰禮
位正坤儀嗣太任之徽音道光千古衣明德之大練儉
化六宮體柔靜以臨朝配清明而燭物慶雲可望共占
至治之祥彤史何知莫贊無為之德妾等猥叅女職仰

奉慈顏因來復之一陽祝無疆之萬壽

皇太后

伏以候氣葭灰喜律筒之已應課功綵線知官日之初
長品物向榮掖廷胥悅恭惟皇太后殿下母臨四海婦
應東朝求賢審官但有憂勤之志躬儉節用豈忘澣濯
之衣宜福祿之日康樂宮闈之無事妾等濫塵女職獲
奉慈顏願先柏酒以稱觴更指椿年而獻壽

坤成節集英殿宴教坊詞

元祐二年七月十五日

教坊致語

臣聞視履考祥既占衷月之夢對時育物必有繼天之
功方大火之西流履陰靈之既望帝於是日誕降仁人
意使斯民咸歸壽域共慶千年之遇得生二聖之朝式
宴示慈與民同樂恭惟皇帝陛下文思天縱睿哲生知
力行禹湯之仁常恐一夫之不獲躬蹈曾閔之孝故得
萬國之歡心恭惟太皇太后陛下道契天人德超載籍
知人則哲蓋帝堯之所難修已安民雖虞舜其猶病風

雲從而萬物覩日月照而四時行自然動植之咸安莫
知天地之何力三宮交慶群后駿奔寶鄰通四牡之歡
航海致重譯之臚洞庭九奏始識咸池之音靈嶽三呼
共獻後天之祝臣等叨居法部輒採民言上瀆宸聽敢
陳口號

口號

三朝遺老九門前又見承平大有年文母憂勤初化俗
曾孫仁孝已通天史書元祐三千牘樂奏坤成第一篇

欲採蟠桃歸獻壽蓬萊清淺半桑田

勾合曲

秋風協應生殿閣之微涼廣樂具陳韻金絲而間作欲
觀鳥獸之率舞願聞笙磬之同音上奉宸顏教坊合曲

勾小兒隊

朱干玉戚本以象功白叟黃童皆知頌聖盍命髧髧之
侶來陳舞勺之儀上侑皇歡教坊小兒入隊

隊名

願同千歲樂長奏太平謠

問小兒隊

鵲京廣燕方雲集於縉紳沂水游童忽鳬趨於庭廡雖
云小技必有可觀咫尺天顏悉言汝志

小兒致語

臣聞功存社稷慶鍾高密之門澤及本枝天胙太任之
德候西風之八律藹瑞氣之盈庭嘉與四方同稱萬壽
恭惟皇帝陛下文思稽古濬哲在躬日奉東朝之歡率

用家人之禮以謂慈儉之化無德而能名保佑之功如天之難報惟流傳於歌舞庶髣髴其儀刑臣等雖在弱齡久陶孝治敢率垂髫之侶共陳振萬之儀未敢自專伏取進止

勾雜劇

鸞旗日轉雉扇雲開
蹙回綴兆之文少進俳諧之技來
陳善戲以佐歡聲上樂天顏雜劇來歟

放小兒隊

青衿旅進雖末技而畢陳黃屋天臨知下情之無壅既
成文於綴兆爰整袂以徘徊再拜天階相將好去

勾女童隊

彤壺漏箭隨鷄唱以漸移絳節綵髦聞鳳簫而自舉宜
召散花之侶來陳回雪之姿上奉宸歡兩軍女童入隊
隊名

金風回翠袖玉琯倚清歌

問女童隊

鳳歌諧律方資燕俎之歡鷺羽分庭忽集壽山之下低
鬟有待振袂欲前密邇天階悉陳來意

女童致語

妾聞塗山啟夏來王帛於萬邦摯仲興周祚本枝於百
世嘉辰共樂壯觀一新恭惟皇帝陛下舜孝自天堯仁
浹物膺昊穹之成命席累聖之詒謀惟地勢坤永載無
疆之德以天下養躬持胥樂之觴六樂在庭百工奏技
妾等親逢盛旦獲望嚴宸藝雖愧於鷺鴻心已先於儀

鳳願陳舞綴上奉天顏未敢自專伏取進止

勾雜劇

風清羽蓋日轉槐庭欲資載笑之歡必有應諧之妙暫
回舞綴少進詆辭上悅天顏雜劇來歟

放隊

八音間作既成皦繹之文萬舞畢陳曲盡回翔之態望
彤闈而却立歛翠袂以言歸再拜天墀相將好去

集英殿春宴教坊詞

教坊詞語 中和化育萬壽排場

臣聞人和則氣和故王道得而四時正今樂猶古樂故
民心悅而八音平幸此聖朝陶然化國飭三農於保介
維莫之春興五福於太平既醉以酒恭惟皇帝陛下秉
乾有作出震無私憲章六聖之典謨斟酌百王之禮樂
天方胙於舜孝人已誦於堯言故得彛倫敘而水土平
北流軌道士人退而蠻夷服西旅在庭稍寬中昊之憂
一均湛露之澤方將麤蕞群賢而惡旨酒鼓吹六藝而

放鄭聲雖白雪陽春莫致天顏之一笑而獻芹負日各
盡野人之寸心臣猥以賤工叨塵法部幸獲望雲之喜
敢陳擊壤之音不揆燕才上進口號

口號

萬人歌舞樂芳辰長養恩深第四春
令下風雷常有信時來草木豈知仁
璿璣已正三堦泰玉琯初知九奏純
更欲年年同此樂故應相繼得元臣

勾合曲

太平無象善萬物之得時和氣致祥喜八風之從律大
合鈞天之奏克諧治世之音上奉嚴宸教坊合曲

勾小兒隊

斑白之老既無負戴之憂齒亂之童亦遂嬉遊之樂行
歌道路聯袂闕庭仰奉宸慈小兒入隊

隊名

初成暮春服來獻太平謠

問小兒隊

聚戲里閭豈識九重之興成文綴兆忽隨六樂之和宜
近彤墀悉陳來意

小兒致語

臣聞春為陽中生物各遂其性樂以天下聖人豈私其
身故飲食盡忠臣心而遊豫為諸侯度方遲日之無事
矧嗣歲之有年大啟璧門肅陳燕豆恭惟皇帝陛下道
隆而德備質文而性仁總攬群才蓋天授之神策澄清
庶政故民獻以寶符顧良辰樂事之難并宜群臣嘉賓

之並集廣場千步方山立於衆工大樂九成固海函於
雜技臣等沐浴膏澤咏歌昇平幸以髣髴之微得參舞
羽之末敢干宸聽伏俟俞音

勾雜劇

臚傳已久陞楯將更宜資載笑之歡少進群優之技緩
調絲竹雜劇來歟

放小兒隊

清歌屢奏蓋曲盡於下情妙舞載陳示不遺於小物既

畢沛風之和稍同沂水之歸再拜天堦相將好去

勾女童隊

燕私之樂下侍於臣工靡曼之觀聊同於俚俗審音而
作振袂稍前上奉宸歡兩軍女童入隊

隊名

瑞日明歌扇仙飈動舞衣

問女童隊

工師奏技侍衛聳觀顧游女之何施集彤庭而有待欲

知來意宜悉敷陳

女童致語

妾聞聖人授民以時王者與衆同樂故倉庚鳴而蠶女
出游魚躍而靈沼春蓋良辰豈易得哉亦賢者而後樂
此伏惟皇帝陛下溫恭允塞緝熙光明學無常師文武
識其大者仁能濟衆堯舜其猶病諸齊泰階之六符走
重譯之萬里天人並應禮樂將興豈惟塵土之賤微敢
度乾坤之廣大萬舞九奏雖未象於成功間歌三終亦

庶幾於頌德欲殫末技少効寸誠

勾雜劇

風斜御柳既窮綺麗之觀日轉庭槐少進訴優之戲再
調絲竹雜劇來歟

放女童隊

翠袖風回已盡折旋之妙文茵霞卷尚觀顧步之餘再
拜天墀相將好去

集英殿秋宴教坊詞

教坊致語

臣聞天無言而四時成聖有作而萬物覩清淨自化雖
仰則於帝心愷悌不回亦俛同於衆樂屬此九秋之候
粲然萬寶之成吾王不游何以勞農而休老君子如喜
則必大亨以養賢恭惟皇帝陛下孝通神明仁及草木
行堯禹之大道守成康之小心華夷來同天地並應以
謂福莫大於無事瑞曷加於有年南極呈祥候秋分而
老人見西夷慕義涉流沙而天馬來嘉與臣工肅陳燕

俎禮元侯於三夏諧庶尹於九成宣示御觴聳近臣之
榮觀臚傳天語溢兩廡之歡聲臣等幸覩昌辰叨塵法
部採謠言於擊壤助矇眊之陳詩仰奉威顏敢進口號
口號

霜霏碧瓦尚生烟日泛彤庭已集仙藹藹四門多吉士
熙熙萬國屢豐年高秋爽氣明宮殿元祐和聲入管絃
菊有芳兮蘭有秀從臣誰和白雲篇

勾合曲

西風入律間歌秋報之詩南籥在廷備舉德音之器絃匏一倡鐘鼓畢陳上奉宸嚴教坊合曲

勾小兒隊

皇慈下逮聲百執以均歡衆技畢陳示四方之同樂宜進垂髫之侶來修秉翟之儀上奉威顏教坊小兒入隊

隊名

登歌依頌磬下管舞成童

問小兒隊

大君有命肆陳管磬之音童子何知入籛工師之末欲
詳來意宜悉奏陳

小兒致語

臣聞天行有信正得秋而萬寶成君德無私日將旦而
群陰伏清風應律廣樂在庭占歲事於金穰望天顏之
玉粹沐浴膏澤詠歌升平恭惟皇帝陛下天縱聰明日
躋聖知無一物之失所得萬國之驩心雖擊壤之民固
何知於帝力而後天之祝亦各抒於下情臣等幸以韶

齒之年得居仁壽之域詠舞雩於沂水久樂聖時唱銅鞮於漢濱空慙郢一作但曲願陳舞綴少奉宸歡未敢自專伏候進止

勾雜劇

朱絃玉琯屢進清音華翟文竿少傳逸綴宜進訴諧之技少資色笑之歡上悅天顏雜劇來歟

放小兒隊

回翔丹陛已陳就日之誠合散廣庭曲盡流風之妙歌

鐘告闕羽籥言旋再拜天階相將好去

勾女童隊

錦薦雲舒來九成之丹鳳霞衣鱗集隱三壘之靈鼉上
奉宸嚴教坊女童入隊

隊名

香雲浮繡宸花浪舞彤庭

問女童隊

清禁深嚴方縉紳之雲集仙音彈緩忽簪珥之星陳徐

步香茵悉陳來意

女童致語

妾聞鈞天廣樂空傳帝所之游閭闔清風理絕庶人之
共夫何仙聖靡隔塵凡仰瞻八采之威目慶千齡之運
恭惟皇帝陛下乾健而粹離明而文規摹六聖之心人
將自化儀刑文母之德天且不違樂茲大有之年申以
宗慈之會虞韶既畢夏籥將興妾等分綴以須審音而
作頌俟工歌之闋少同率舞之歡未敢自專伏取進止

勾雜劇

絃匏迭奏千羽畢陳洽聞舜樂之和稍進齊諧之技金
絲徐韻雜劇來歟

放隊

羽觴湛湛方陳既醉之詩鼉鼓淵淵復奏言歸之曲
戕鬟佇立斂袂却行再拜天階相將好去

興龍節集英殿宴教坊詞

元祐二年

教坊致語

臣聞帝武造周已兆興王之迹日符胙漢實開受命之
祥非天私我有邦惟聖乃作神主仰止誕彌之慶集于
建丑之正瑞玉旅庭爰講比鄰之好虎臣在泮復通西
域之琛式燕示慈與人均福恭惟皇帝陛下睿思冠古
濬哲自天煥乎有文日講六經之訓述而不作思齊累
聖之仁夷夏宅心神人協德卜年七百方過歷以承天
有臣三千咸一心而戴后彤庭振萬玉座傳觴誦干戈
載戢之詩作君臣相悅之樂斯民何幸白首太平臣猥

以微生親逢盛旦始慶倚蘭之會願廣擊壤之音下採
民言上陳口號

口號

凜凜重瞳日月新四方驚喜識天人共知若木初升旦
且種蟠桃莫計春請吏黑山歸屬國給扶黃髮拜嚴宸
紫皇應在紅雲裏試問清都侍從臣

勾合曲

祝堯之壽既罄於歡謠象舜之功願觀於備樂羽旄在

列管磬同音上奉宸嚴教坊合曲

勾小兒隊

魚龍奏技畢陳詭異之觀韶亂成童各效回旋之妙嘉其尚幼有此良心仰奉宸慈教坊小兒入隊

隊名

兩階陳羽籥萬國走梯航

問小兒隊

工師在列各懷自獻之能俛于盈庭必有可觀之技未

知來意宜悉奏陳

小兒致語

臣聞生民以來未有祖宗之仁厚上帝所眷錫以聖神之子孫孚佑下民篤生我后瞻舜瞳之日月望堯顙之山河若帝之初達四聰於無外如川方至傾萬宇以來同恭惟皇帝陛下齊聖廣淵剛健篤實識文武之大者體仁孝於自然歌詩思齊見文王之所以聖誦書無逸法中宗之不敢康誕日載臨輿情共祝神筴授萬年之筭

洛書開五福之祥臣等嬉遊天街沐浴皇化欲陳舞蹈
之意不知手足之隨未敢自專伏取進止

勾雜劇

金奏鏗純既度九韶之曲霓衣合散又陳八佾之儀舞
綴暫停伶優間作再調絲竹雜劇來歟

放小兒隊

游童率舞逐物性之熙怡小技畢陳識天慈之廣大清
歌既闋疊鼓屢催再拜天堦相將好去

勾女童隊

垂鬟在列斂袂稍前豈知北里之微敢獻南山之壽霓
旌坐集金奏方諧上奉威顏兩軍女童入隊

隊名

君臣千載遇歌舞八方同

問女童隊

揅撾屢作旌旆前臨顧游女之何能造彤庭而獻技欲
知來意宜悉奏陳

女童致語

妾聞瑞乙來翔共紀生商之兆群龍下集適同浴佛之
辰佳氣充庭和聲載路輦出房而雷動扇交翟以雲開
喜動人天春還草木恭惟皇帝陛下凝神昭曠受命穆
清三后在天宜興王之世有四人迪哲知享國之無窮
乃眷良辰欲均景福庭設九賓之禮樂歌四牡之章妾
等幸覲昌期獲瞻文陛雖乏流風之妙願輸率舞之誠
未敢自專伏候進止

勾雜劇

清淨自化雖莫測於宸心
詆笑雜陳示俛同於衆樂
金絲再舉雜劇來歟

放女童隊

分庭久立漸移愛日之陰
振袂再成曲盡回風之態
龍樓却望鼙鼓屢催再拜
天階相將好去

紫宸殿正旦教坊詞

元祐四年

教坊致語

臣聞行夏之時正莫加於人統採周之舊王方在於鎬
京惟吉月之布和休庶工而未作使華遠集隣好交脩
萃簪笏於九門來車書於萬里將興嗣歲以樂太平恭
惟皇帝陛下躬履至仁誕膺眷命法天地四時之運民
日用而不知傳祖宗六聖之心我無為而自化九德咸
事三年有成始御八音之和以臨元日之會人神相慶
夷夏來同臣等忝與賤工得親壯觀知輿情之願頌顧
盛德之難形不度荒蕪敢進口號

口號

九霄清蹕一聲雷萬物欣榮意已開
曉日自隨天仗出春風不待斗杓回
行看菖葉催耕籍共喜椒花暎壽杯
欲識太平全盛事振振鵷鷺滿雲臺

勾合曲

東風應律南籥在庭饒臘迎春方慶
三朝之會登歌下管願聞九奏之和
上悅天顏教坊合曲

勾小兒隊

工師奏技咸踴躍以在庭穉孺聞音亦回翔而赴節方
資共樂豈間微情上奉宸歡教坊小兒入隊

隊名

仙山來絳節雲海戲群鴻

問小兒隊

六樂充庭九賓在列何彼垂髫之侶欲陳振袂之能必
有來誠少前敷奏

小兒致語

臣聞正月上日萬彙所以更新群臣嘉賓四方於是觀
禮雪方占於上瑞風已告於先春及此良辰設為高會
恭惟皇帝陛下子來九有天覆兆民煥乎其有文章昭
然若揭日月安西都護來輸八國之琛南極老人出效
萬年之壽還圭璋於鄰使受圖籍於春朝擊石拊金奏
鈞天之廣樂跳毬舞索戲平樂之都場臣等沐浴太平
詠歌新歲鼓舞咸韶之韻踰揚鳥獸之間未敢自專伏
候進止

勾雜劇

以雅以南既畢陳於衆技載色載笑期有悅於威顏舞
輟暫停優詞間作金絲徐韻雜劇來歟

放小兒隊

酒闌金殿既均湛露之恩漏減銅壺曲盡流風之妙望
彤墀而申祝整翠袖以言歸再拜天堦相將好去

興龍節集英殿宴教坊詞

教坊致語

臣聞天所眷命生而神靈惟三代受命之符萃于茲日
實萬世無疆之福延及我民候南極之祥輝交北鄰之
瑞節同超鎬燕爭頌堯封恭惟皇帝陛下稽古溫文秉
乾剛粹體生知而猶學藏妙用於何言故得六聖承休
三靈眷佑德隆星晷齊六符而泰階平河行地中錫九
疇而彛倫正屬誕彌之令旦履長發之嘉祥夙設九賓
於廷遍舞六代之樂日無私於臨照葵藿自傾天有信
於發生勾萌必達臣等歷塵法部獲造彤墀下採民言

得三萬里之謠頌登歌壽筭以八千歲為春秋不度蕪
音敢進口號

口號

風卷雲舒合兩班瞳瞳瑞日映天顏觀書已獲千秋鏡
積德長為萬歲山臘雪未消三務起壬人不用五兵閑
相逢父老爭相賀却笑華胥是夢間

勾合曲

笙磬同音考中聲於神鼓鳥獸率舞浹和氣於敷天上

奉宸歡教坊合曲

勾小兒隊

衆技旅庭振歡聲於無外游童頌聖陶至化於自然上
奉皇威教坊小兒入隊

隊名

壤歌皆白髮象舞及青衿

問小兒隊

跳踉廣陌初疑竹馬之遊合散彤墀忽變驚鴻之狀欲

知來意宜悉敷陳

小兒致語

臣聞流虹啓聖非人力所致之符湛露均恩與天下共
享其樂旁行海宇外薄戎夷咸欣載風之辰共獻無疆
之祝恭惟皇帝陛下神武不殺將聖多能天生德於予
既稟徇齊之質人樂告以善輔成經緯之文法慈儉於
東朝紬詩書於西學載臨誕日俛荅輿情非為靡曼之
觀庶備太平之福臣等樂生韶武學樂父師就列紛紜

雖無殊於鳥獸赴音俛仰亦少效於涓塵未敢自專伏
候進止

勾雜劇

樂且有儀乃古君之相悅張而不弛豈文武之常行欲
佐歡聲宜陳善謔金絲徐韻雜劇來歟

放小兒隊

末枝畢陳下情無壅既成文於綴兆猶斂袂以回翔再
拜天堦相將好去

勾女童隊

飛步壽山起香塵於羅襪散花御路泛回雪於錦茵上
奉宸顏兩軍女童入隊

隊名

生商來瑞鳥浴佛降群龍

問女童隊

玉座天臨雖仙凡之有隔翠鬟雲合豈草木之無知密
邇天堦悉陳來意

女童致語

妾聞千里一曲變澄瀾於濁河萬歲三稱隱歡聲於靈
岳天人並應夷夏來同雖云北里之微敢獻華封之祝
恭惟皇帝陛下睿文冠古神智無方同堯舜之性仁而
能濟衆陋成康之刑措猶待積年共欣建丑之正再覩
興龍之會桑田東海傾壽筭而未乾汗竹南山書頌聲
而無極妾等幸緣賤藝獲望載顏振萬千庭欲赴千旄
之節間歌以雅庶諧笙磬之音未敢自專伏候進止

勾雜劇

舞綴暫停歌鍾少闕必有應諧之妙以資載笑之歡上
悅天顏雜劇來歟

放女童隊

振袂再成曲盡回風之妙分庭久立漸移愛日之陰再
拜天堦相將好去

齋日致語口號

旋復陰陽配五支於六幹誕彌歲月與元日為三申神

后降慶於當年曾孫效誠於茲旦不煩巧歷自契真符
道俗謹謠天人協應太皇太后陛下功高任如德配唐
虞上推顧託之心下布仰成之政寶慈與儉蹈光憲之
成規却狄安邦襲烈武之餘慶三朝順履萬壽維新雖
絳縣之老人難窮甲子如楚南之靈木莫計春秋臣賤
等草茅心傾葵藿採民謳於擊壤効樂語之陳詩

媯皇得道自神仙金母長生不計年甲子會逢三朔旦
歲星行看百周天消兵漸覺腰無犢種德方知福有田

彤管何人書後會椒花椿頌一時編

黃樓致語口號

百川返壑五稼登場初成百尺之樓適及重陽之會高
高下下既休畚鍤之勞歲歲年年共覩茱萸之美恭惟
知府學士民人所恃憂樂以時度餘力而取美材因備
灾而成勝事起東郊之壯觀破西楚之淫名賓客如雲
來四方之豪傑鼓鐘隱地竦萬目之觀瞻實與徐民長
為佳話

一新柱石壯嚴闈更值西風落帽辰不用游從誇燕子
直將氣焰壓波神山川尚遠當時國城郭猶飄廣陌塵
誰凭欄干賞風月使君留意在斯民

趙倅成伯母生日致語口號

昔年占夢適當重九之佳辰今日獻香願祝大千之遐
算慶婦姑之同日雜茱菊以稱觴殺雞已效於龐公剪
髮敢資於陶母但某叨居樂部忝預年家不度蕪材上
塵口號

今朝壽酒泛黃花鬱鬱葱葱氣滿家願得唐兒舞一曲
莫嫌國小向長沙

王氏生子致語口號

人中五日知織女之暫來海上三年喜花枝之未老事
協紫銜之夢歡傾白髮之兒好人相逢一杯徑醉伏以
某人女郎蒼梧仙裔南海貢餘憐謝瑞之早孤潛炊相
助嘆張鎬之沒興遇酒輒歡采楊梅而朝飛擘青蓮而
暮返長新王女之年貌未厭金膏之掃除萬里乘桴已

慕仲尼而航海五絲繡鳳將從老子以俱仙東坡居士
尊俎千峯笙簧萬籟聊設三山之湯餅共傾九醞之仙
醪尋香而來苒天風之引步此興不淺烟江月之升樓
羅浮山下已三春松筍穿堦晝掩門太白猶逃水仙洞
紫簫來問玉華君天容水色聊同夜髮澤膚光自鑑人
萬戶春風為子壽坐看滄海起揚塵

寒食宴提刑致語口號

良辰易失四者難并故人相逢五斗徑醉况中年離合

之感正寒食清明之間時乎不可再來賢者而後樂此
恭惟提刑學士才本天授學為人師事業存乎斯民文
章蓋其餘事望之已試於馮翊翁子暫還於會稽知府
學士接好隣邦締交冊府莫逆之契義等於天倫不腆
之辭意勤於地主力講兩君之好可無七子之詩欲使
異時爭傳盛事

雲間畫鼓疊春雷千騎尋芳戲馬臺半道已逢山簡醉
萬人爭看謫仙來淮西按部威尤凜歷下懷仁首重回

還把去年留客意折花臨水更徘徊

東坡全集卷一百一十五

謹案卷一百十四第二十七頁前八行載惻予衷
刊本衷訛哀今改

卷一百十五第二頁前五行共道十年無臘雪刊
本雪訛雲據別本改

第二十四頁後一行宜悉奏陳刊本宜訛宮據別
本改



總校官庶吉士臣張能照
校對官庶吉士臣徐如澍
膳錄監生臣陳增